





黔草卷二目錄

奏疏

報賊阻東坡請增兵疏

請再增兵餉疏

請借川湖庫金疏

參總兵到任違限疏

報賊破龍泉上司疏

報賊襲土官疏

參五開參將失事疏

增設庫吏疏





續衣生黔草卷之二

恭和郭子章相奎甫著  
友人楊寅秋義叔甫校

奏疏

報賊阻東坡請增兵疏

謹題為播寇突出充斥與隆黃平之間阻塞官路殺擄  
居民懇乞 聖明嚴勅援兵以拯危急事萬曆二十七年  
十一月十八日據清平縣知縣劉啓周申報本月十三日  
卑職親至重安江查兵忽聞播賊列營七處圍劫重安乞  
賜發兵應援等因本月二十日又據興隆衛申報十一月



十六日亥時據東坡軍人李萬等飛報播立數萬徑出梭洞圍殺白田乾溪水口等屯堡燒擄房屋人口家財由白泥出大小章劄營又五萬由構皮灘過河到白泥劄下有三大營八小營攻圍東坡又要攻打興隆黃平衛所城池等因又據防守黃平叅將劉效節把總李朝陽帶管都清兵巡道按察司副使尤錫類呈報俱同前因該臣差官隨調各衛所官兵前往應援去後本月二十四日又據四川重慶府知府張與行揭報據把總劉添忠兵李子忠報稱楊酋於十一月初五日發兵二萬劄在官壩與南基相連又據東鄉邊勇報稱楊酋親領兵數萬出發川等情合行

稟報等因同日又據貴州布政司分守新鎮道今降調參議梁銓呈報據興隆巡捕指揮常靖國并防守東坡把總許攀龍傳報苗賊二萬來劫東坡勢甚猖獗職一面發兵應援一面調叅將劉效節兵接應印捕官帶領蒙兵沅州鎮溪兵接應此時苗賊蜂擁迎來鎮溪所兵奮力抵敵頗有功級悉被奪去柰緣後兵不力被苗包圍不能全勝回兵固守城池十八九等日節行偵探苗建五營於十里之外兩投木刻俱稱來衛追要權張熙等語及查此賊俱係近寨熟苗為苗勾引即今十里橋與東坡絕無人煙偏鎮音信不通該衛士民慌忽無計職係去官雖盡心力事



多掣肘等因同日又據駐鎮興隆同貴陽府同知徐廷綬  
呈報本月十九日辰時據哨探軍兵執報木刻上寫播州  
總把事隆諭知興隆通衛官民吾今督兵數萬追尋欺主  
叛逆姦徒行至地名東坡切被無知流徒積兵千餘截殺  
吾兵勢不得已定決雌雄近查本司女奴徒馮權張熙等潛  
入興隆衛內不思舊惡再欲叛逆欺主爾等早要省悞照  
名發出以免刀兵之患等語二十日又據執報木牌上寫  
正欲發兵來衛追尋逃奴何以爵羅承恩楊京馮權等各  
衛何故發兵把截地名梭洞等處不容該管九股夷僚往  
來實係你與隆偏橋甲不有切害又不容我辯訴你各衛兵

每處不過數千何故猖狂紛紛阻截要路即將姦奴照名  
發還以免屠城大患等因到臣除臣催調各將領官兵星  
馳前赴應援及嚴行興隆黃平偏橋平越各將官竭力固  
守城池外看得賊勢重大動稱數萬連營結寨窺我衛城  
塞我官路令楚黔之咽喉不通一應 奏疏兵餉文移俱  
不得達其志甚大其謀甚詭其勢亦甚岌岌矣臣分布興  
隆之兵三千八百名清平之兵二千一百名黃平之兵四  
千九百有零平越之兵三千一百有零鎮遠施秉之兵六  
百有零石阡之兵三千四百有零思南婺川之兵三千有  
零龍泉之兵一千九百有零赤水之兵六百有零貴陽之兵



五千六百有零永寧蜀兵五千名自貴陽府以及西四衛  
烏江水西諸路屬之監軍按察使楊寅秋駐貴陽自下六  
衛所以及思石等府諸路屬之監軍參議張存意駐清平  
合之則通省兵共二萬九千分之則每城僅止數千兵分  
則勢弱彼此不能相援播賊一舉動必合二三萬攻一城  
又故多方出兵以牽我師故今日之用兵不得不多多者  
其勢然也督臣李化龍復調雲南兵七千廣西兵一萬臣  
復調湖廣永保兵一萬分駐各衛為遊兵而尚未即至近  
播四道用兵半年參議梁銓到而復將去其餘三道竟無  
一至湖廣辰沅兵備竟亦未入偏橋貴州總兵童元鎮以

十一月初九日交代尚駐銅仁未入貴陽湖廣總兵陳璘  
傳牌雖到亦未入黔楚兵三四千分劄偏鎮勢甚寡弱今  
東坡之賊不退則楚黔之路不達陛下發京餉六萬尚  
阻於辰沅雲南太監楊榮進上之扛亦阻於貴陽廣西  
福建二十萬之餉即至亦不能入楚滇二十一萬之餉又  
屬烏有臣自六月至今雲南解到銀五萬又二萬留作滇  
中七千兵衣甲行糧以故未解川餉解到銀二萬二千六  
十六兩一錢八分內除四千還布政司作飛練用兵借過  
之銀六千給布政司作龍泉舊餉之銀臣實有餉六萬支  
特半年用過四萬餘而今兵至者已二萬九千未至者尚



二萬七千總之十二月終皆可畢至豈二萬之金所能接濟乎臣意欲就於川中借銀十萬即以福建十萬金逕解補之滇中借銀十萬即以廣西十萬金逕解補之前兵部咨稱老庫未發銀十萬兩乞全給黔兵從蜀解入黔中而楚滇二十一萬未有之金早為區處如數解給更乞 皇上勅下兵部嚴催湖廣三萬之兵及總兵陳璘副使王應霖早入偏橋共鋤東坡之賊以紓咽喉之急嚴催滇粵一萬七千之兵早入貴陽雲南總兵沐睿入霑益廣西總兵李如樟入泗城共圖掎角之勢以為黔中之援臣日夕佇望有如倒懸而臣猶有說焉地方多難文武共憂集兵聚

餉責在撫臣援戈仗劍責在總兵自有播患以來川貴總兵畏賊甚於畏法愛身重於愛國在沈尚文則高枕不出今則優游泉林矣在劉綎遷延不入今則安閒善地矣彼富貴已極又何所畏忌而必於討賊邪新到總兵伏乞天語責成毋蹈前轍共紓寇難以必期於蕩平若使陛下之令不行於總兵則總兵之令不行於偏裨偏裨之令不行於三軍而臣等將何所恃以收西南之危局邪此非細故也故臣不避斧鉞為 皇上陳之伏乞 勅下戶兵二部一併覆議施行臣不勝激切待 命之至

請再增兵餉疏



謹題為播賊分道突犯全黔勢甚貼危懇乞聖明再  
增兵餉以採然眉事本年十一月二十九日據新添衛報  
稱本月二十八日亥時蒙防守平越原任參將今充為事  
官蔡兆吉稟稱播兵數萬攻陷王解圍劄兵聲言往新添  
攻打屯寨該衛官兵晝夜謹守城池隨據本衛所管喇啞  
夷民報稱播兵萬餘已將王解燒劫盡空且王解逼近本  
衛乞賜發兵應援等因同日又據帶管新鎮按察司驛傳  
道副使尤錫類報稱據防守平越為事官蔡兆吉駐鎮知  
州李珏稟據平越衛劉家堡民鄒應龍報稱見賊楊總管  
董提調郭提調管領賊兵過雍水河稱要打我江山地方

又發掃帚一把火燒木刻一箇去播州趕兵掃土快來等  
因同日又據監軍右叅議張存意報稱據平越衛呈報本  
月二十七日午時據管理王解犯總安榮報稱突被播賊  
數萬四路攻打本解榮當統苗向敵賊勢重大難抵被賊  
攻破頭寨殺死寨苗男婦不計其數放火大燒倉房衆苗  
擁榮奮死奪回屢據偵探人役報稱播苗數萬過河屯劄  
各處聲息攻城乞賜添兵策應等因本月三十日據清平  
縣知縣劉啓周稟據凱里楊燧報稱野洞七寨苗俱要反  
出由狗窩攻打清平城等情又據趙崇報稱七洞等苗已  
攻打狎橫欲與七寨由草塘司入揚老攻打平越清平俱



有定約伏乞憫念孤城添兵防禦等因十二月初二日據  
防守黃平叅將劉效節及通判王三策指揮徐登階報據  
防守得勝關百戶薛應時稟稱十一月二十五日被播賊  
楊七楊總管統兵前來翁巖高漆劄營聲言我今日來報  
信我主楊太爺已經令各處搭完浮橋大兵的於二十七  
八准來攻你平溪浪洞黃平與東坡黃蓮柳塘等處我兵  
在此劄營口等大兵四路齊到來攻卑職分兵四路哨探  
播兵日夜經過不絕播曾詭計甚多請乞加兵各處隘口  
把截事在然眉等因本月初四日又據清鎮守備王之棟  
并偏橋衛指揮許繼祖揭報播賊於十一月二十二日倡

狂擁衆劄營於偏橋城南官道水井坡離城五里大勢圍  
城我兵固守城外劄營對壘一日我兵傷賊馬兵奪獲綿  
被二牀各賊方退臺蠟原營去訖查得內有陣亡漢兵湯  
法等七名土兵高元等七名擄去漢兵一名羅仲重傷兵  
母成宗等三名其節次申報事俱經繳回又差兵由小路  
遞送被其截路草塘黃母徐姚爛橋一帶等哨堡軍兵四  
散人煙盡絕本衛漢土官兵二千有零謹守城池賊勢重  
大不敢輕出等因本月初六日又據湖廣辰沅兵備副使  
王應霖報同前因同日又據鎮遠衛揭報十一月十八日  
准本衛巡捕指揮何天寵關據本衛軍餘郭正朝走報本



日天明時分被播夷約有五六千餘將本衛許花屯中屯周旗屯窩底屯一帶地方盡劫一空擄去男婦李賢火孫等數十等情各直報等因本月初九日又據布政司帶管分守思仁道左叅政郭廷良呈十一月三十日據管思石守備事都司楊惟中報據坐鎮指揮胡効忠報據四十八屯軍餘黎廷恩等連夜前來報稱播賊何漢良住劄馬渡起七頭苗兵點齊於二十八日劄營三跳威逼恩等講取思石婺川龍泉地方今已知 朝廷旨意先是進剿今又是剿了來說到此田地左右是死不壞也是壞了四川水西蘭州白泥黃平已分兵敵殺你龍泉思石婺川若不先

下手剿蕩將來大兵容易入境此番定然是實等情到職及查見今偏橋興隆被賊劄營接收九股生苗裏應外合等因同日又據監軍叅議張存意呈報本月初六日據興隆衛呈據鄉導陳八報據臺蠟寨苗老九傳出播州把事木刻說是本衛詐哄連和我大兵已齊不日攻圍偏橋黃平你興隆既要免禍可備銀二千兩退兵待我打了偏橋黃平各兵見於校洞立營劄兵數萬要打攻圍城池禍在然眉萬分緊急等因各揭報到臣除調官兵分布採援其殺傷官兵及失事員役容臣等查覈另 題外今照前因臣謹會同總督川湖貴州軍務兼理糧餉巡撫四川地方



兵部右侍郎兼都察院右僉都御史李化龍巡按貴州監察御史宋興祖看得播酋楊應龍逆節滔天自分罪在不宥又計黔中衛所郡縣數千里而遙所在單弱漢土官兵分布城守不足抗禦乃糾拽生苗分道突犯先梗塞餉道次偏攻城池爲先發制人之計初據興隆偏橋二衛報稱攻破東坡爛橋等處殺擄軍民慘毒異常今則鎮遠衛告殺擄許花屯堡矣平越新添告王解困被擄矣黃平告楊七統兵翁巖矣龍泉告何漢良劄兵三跳矣在在皆賊處處告急楚兵三萬滇粵永保之兵三萬聲息至今杳然辰沅道兵備副使王應霖尚在沅州總兵童元鎮交代一月

仍駐銅仁俱未接足到偏橋興隆參將陳寅婺川參將王鳴鶴俱泄泄未知進止何在粵貝之阨危甚於累卵其尤急者偏橋興隆之間東坡爛橋重安三處實楚黔之交會滇貴之咽喉此地一爲賊據則楚不得入黔滇不得出楚匪獨無黔且并無滇此必爭必守之地非大集勁兵勢必不守臣等會議得東坡爛橋重安三處每處當設重兵一萬爛橋東坡重安三處共三萬庶幾道路可通咽喉不塞而後可以議及大舉顧此三萬之兵又當在原議兵數之外臣等非不知兵多費餉而此三處無兵即有餉亦不能達今參將朱鶴齡之餉阻於鎮遠不得入黔者爲此路之塞



故也伏乞 皇上軫念全黔坐諸水火 勅下戶兵二部  
急催楚兵三萬以株偏橋思石一帶催滇粵永保兵三萬  
以株興黃貴陽一帶容臣等再募兵三萬分屯東坡爛橋  
重安二處以固要害而通喉舌增兵糧餉嚴督如數解發  
未到各官嚴督如期入黔仍復規避逗遛者容臣等查察  
處治庶幾易危爲安在此一舉不然黔滇二省臣惴惴且  
莫必其終矣臣等無任激切待 命之至

請借川湖庫金疏

謹 題爲黔中需餉然眉異省加派難待懇乞先借川湖  
庫金就扣加派抵還以濟軍興事本年十二月初七日臣

接得邸報戶部一本夷氛甚惡 下 討宜彰等事復總督

臣李化龍會同臣等題同前事內稱貴州於雲南取銀二  
十二萬據報止解過銀七萬餘兩廿六餘無從處解又湖廣  
一十一萬有零廣西福建各十萬共計三十八萬有零催  
督軍前支用去後今該前因數尚不敷於湖廣四川二省  
夏稅秋糧加派銀共三十八萬三千餘兩以佐時急楚得  
其餘蜀得其半貴州處其不足然貴之被難也兵俱新增  
餉無宿儲其需銀實切則取盈濟虛相應不分畛域通融  
支用等因奉 聖旨是兵興餉急這四川湖廣地畝加派  
准權宜行著總督於三省通融支用仍禁有司豪右巧避



貪漁等弊毋致累害窮民兵罷之日即行具奏減免欽此  
欽遵臣反復讀之戶部計處貴州之餉視川湖獨盈憫念  
貴州之苦視川湖獨切 皇上慨然俞允臣不勝加額厚  
幸顧臣之仰給於 皇上者非歲月之急而目前之急也  
臣安敢默然無言貴州地方遼長在在與播爲鄰先議募  
兵四萬分布防守似亦稍足復議大舉督臣李化龍慮路  
岐兵分賊眾我寡調雲南兵八千廣西兵一萬永保兵一  
萬俱劄貴州大約以年終取齊則貴兵實不止六萬有奇  
新設參將陳寅王鳴鶴朱鶴齡都司錢中選等官及犒賞  
製造軍火器具等費俱取足於新餉以一年計之非六七

十萬不可臣自六月受事至今實止有銀六萬兩臣前疏  
已悉之矣又以東坡之賊未退南來之餉益阻臣不得已  
借川餉十萬即以閩餉十萬抵還借滇餉十萬即以粵餉  
十萬抵還然今猶未到也竊計戶部爲臣區區處當有見銀  
而乃以川湖加派處黔之不足臣豈不知加派奉有 明  
旨誰敢慢令愆期第派之閩閩輸之官府即彼此共念時  
艱徵解必待歲餘臣之兵環向旦夕待哺安能俟此伏乞  
勅下戶部川湖濟貴之餉每歲實該銀若干每省先借庫  
銀若干急解貴州即以加派之數立徵抵補在川湖聊煩  
一時之那借在臣可紓萬分之然眉不然脫中之虞必不



能免臣之憂不獨在播且在兵矣總計貴州用兵不止六萬有奇一年當六十餘萬近日川滇解到銀七萬而以一萬補布政司飛練用過之銀及龍泉舊兵之餉其餘各省並未解到臣之焦苦不敢言如國事何此則不能無望於戶部爲臣急處尤不能無望於各省撫臣憐臣之苦而共濟之也伏乞 皇上勅下戶部再加查議急爲設處施行臣無任激切待 命之至

參總兵到任違限疏

謹題爲將官到任違限懇乞 聖明俯念地方多事姑留討賊以責後効事行據貴州按察司王准銅仁總兵童

元鎮手本爲缺官事稱萬曆二十七年五月十一日奉兵部劄付該本部題奉 聖旨童元鎮著以原官充鎮守貴州總兵官兼提督平清等處地方寫制勅與他便者馳赴管事不必候代欽此欽遵備劄不必候代選帶驍騎兵丁多則五千少則三四千俱要人人堪用依限於本年五月二十八日到任等因奉此續准貴州按察司手本奉巡撫貴州右副都御史郭子章案驗准兵部咨同前事奉此又據經歷司呈抄蒙巡按貴州監察御史宋興祖案驗亦同前事蒙此備行催促本職遵照不敢候代擬即束裝就道第募兵議餉非旦夕可齊具呈兵部改限本年八月二



十八日到任其新任廣西總兵限期亦改所有 冬至  
表箋例應本職拜 進且准廣西巡撫右副都御史楊芳  
手本准貴州撫院咨行職調取泗城南丹那地各土州精  
兵及候三院詳行甲務至九月二十日方交與廣西都司  
收掌二十四日起程至湖廣東安縣忽感風寒不能動履  
該本縣知縣張進送醫生劉文裔調治數日力疾登途帶  
醫隨行於十月二十八日至靖州入境十一月初八日到  
平溪初九日與原任總兵沈尚文面代隨准咨送 符驗  
一道 令旗牌五面副關防一顆到職接管任事外合行  
移文轉報等因到司該本司查得總兵童元鎮改限本年

八月二十八日到任今准移稱行至湖廣東安縣染疾調  
治至十一月初九日交代計到任日期違限二箇月零十  
日相應照例叅究但該鎮原在廣西候拜進 冬至 表  
箋又奉行調泗城南丹等兵及候三院詳行甲務方敢起  
程比與無故愆期者稍間况經地方多故應否叅究等因  
呈詳到臣據此案照本年八月二十七日准兵部咨前事  
等因備移到臣就經差人移催該鎮及案行按察司轉催  
去後今據前因該臣謹會同巡按貴州監察御史宋興祖  
看得貴州總兵官童元鎮自五月 簡用改限八月終到  
任不爲不寬乃今受代之期計違劄限七十日當播賊猖



狂之時正臣子急公之日乃延遷道路違限兩月既乏挾  
輒傳楫之勇終非披髮纓冠之義論法相應參究但臨敵  
易將兵家所忌而東安染疾情非無故合無姑貸其遲緩  
之罪專責以討賊之任庶幾收之桑榆用以克清兇慙相  
應留用以責後効或量加罰治以懲怠玩伏乞 勅下兵  
部再加覆議行臣等欽遵施行謹題請 旨

報賊破龍泉土司疏

謹 題爲播賊殘破孤懸土司尋復歸巢謹據實查參失  
事將官以肅軍政事萬曆二十八年正月十八日據貴州  
右監軍道布政司右叅議兼按察司僉事張存意呈稱萬

曆二十八年正月十六日據思南府申本年正月初六日  
據防守本府前茶溪關把總黃明儒報稱播酋步兵六萬  
馬兵三萬於初五日殺破龍泉司本司駐鎮守備楊惟中  
帶兵先於十二月內將家眷送往本府附近鸚鵡溪避住  
該司止有土官安民志兵五百名在司今被殺擄告急會  
移石阡請發大將重兵庶得堵禦等因呈報到府初七日  
據偵兵回稱龍泉司初五日寅時播苗數萬擁至龍泉就  
將本司并鳳凰山營俱圍劄數層一湧進入已將上官安  
民志吏目劉玉鑾綁擄去訖遺失本司印信楊守備於初  
肆日徑至鸚鵡溪潮底河下潛住本備今又帶兵復見住



鸚鵡溪未回播兵尚劄龍泉附近地名魚跳不知何爲等情據此查得楊惟中失事潛入鸚鵡溪避劄本府聞知就於本日移會楊惟中帶兵回守龍泉立功以圖一創至初九日惟中回稱龍泉切近播境深居虎穴逆酋近來在逞勢焰愈猖本職部兵不滿二千彼酋兵馬動稱數萬衆寡難支本年正月初四日本備出謁分守道面議地方事宜行令把總李君寶協同土官安民志料理地方行至地名煎茶溪於初五日辰時據報逆酋楊應龍督兵出犯龍泉本職星馳急回至地名沙灘分兵殿後堅持其千把總李君寶等督兵與賊對敵自卯至午彼兵勢衆約有數萬我

兵寡少難支被賊在陣縛去土官安民志吏目劉玉鑾並死傷官兵查實另行呈報我兵殺死苗賊亦多急難割取首級彼酋稱言欲要長驅直入思南等語本備帶兵聚劄鸚鵡溪堵截虛實情辭希圖倖免據此查得本備標下官兵一千八百名俱係自行遴選召用糧餉按月徑自覈支此外又有湄潭永靖哨把總胡効忠標下月糧本府亦按月聽支不缺其前被殺擄錫落馬頭綏陽等哨亦龍泉所轄隨該本府稟白帶管分守道郭叅政發把總丁文明兵伍百名黃明儒兵五百二員名又發陸希管官兵三百二十二員名前去煎茶溪日頭岩等處相機接應去後至正月



初五日楊惟中一旦離遁遂使逆酋乘虛侵犯致失司印  
流禍一至於此今據各所報前情應合通報除行駐鎮石  
阡都司錢中選督兵前去應援及另文申請大兵外據此  
該本道看得龍泉乃思石二府咽喉孤懸賊境士馬單弱  
自趙仕登授首以後逆酋揣知天討難容輒敢乘虛衝  
突節該本道呈詳兩院行令添兵固守續奉本部院許發  
陝兵施兵俱一時不能齊集彼賊勢猖狂固非數千兵所  
能捍禦而鄰鎮隔越又非一二日所及救援者也及查副  
總兵陳良玘駐鎮偏橋一月頗有調停守備楊惟中堅守  
龍泉二年並無失事但讀原奉題議思石龍泉皆良玘

應援之信地况當賊衆入犯司治官印賴惟中協力以相  
保今據該府備報前來反覆參詳在陳良玘以急守偏橋  
爲詞而屢催不去同舟共濟之義則踈在楊惟中以公出  
思南爲解而懇留不允事不避難之忠未盡情若可原法  
難并貸等因呈詳到臣據此卷查先據帶管思仁道布政  
司左叅政郭廷良思石兵巡道副使路雲龍與石阡府并  
龍泉司土官安民志節報二十七年十二月十八日播日  
何漢良朱敬等統領賊兵數萬一由錫落關將把總喻時  
興哨官刁榮賢楊廷貴與馬頭山把總李惶三俱各殺死  
虜去喻時興兵一百五十名當砍死五十名餘一百名用



木靴穿繫一路由龍洞哨一路由穿礮哨一路由三跳哨  
綁去把總蕭才一郭明選并兵一百二十名一由綏陽哨  
綁去把總冉文燦將永靖營大毛坪等各哨房盡行燒燬  
官兵殺傷大半等因到臣該臣即調防守偏橋副總兵陳  
良玘帶兵二千銅仁守備葛如錦帶兵一千又差人催調  
永順宣慰使彭元錦帶兵五千由銅仁出間道應援尤慮  
其未足也又催督臣所發施州兵八千陝西馬兵二千從  
婺川入援及得正月初五日之報臣又移行總兵官童元  
鎮親督凱里司應襲土舍楊燧把總毛宗慶等兵二千速  
赴應援外爲照龍泉叢爾一土司耳距貴陽千五百里而

遙去播僅二百餘里而近於貴陽爲遼隔之藩籬於播爲  
切近之門戶逼在虎穴瞬息可至臣一入境即慮其以彼  
孤懸當此狂勁去年八月內具題爲地方孤懸無援賊  
勢侵軼可虞等事內稱龍泉無城郭婺川無將官又俱無  
勁兵議將婺川增設參將一員龍安增兵二千隨該兵部  
覆議上請增設參將推補今狼山副總兵王鳴鶴臣又  
查得都司楊惟中守龍泉二年曾殺播賊項逆酋公移至  
大加怨恨臣知其伎倆已窮顯去之似爲賊報怨乃咨兵  
部量移別地另選材勇將官以補其缺兵部亦如臣議  
題稱龍泉兵少無城恐起別禍暫將楊惟中移置量陞遊



擊而以今江南副總兵坐營沈弘猷補之臣之慮龍泉者非不蒿目苦心顧自去年六月至十二月解餉無幾支持半年藩司司庫僅存四千五百金即那借無從勢難多募而王鳴鶴沈弘猷俱未入境狡酋自分天討必加乘我大兵未集以數萬之苗賊襲無城之上司此非賊之強實我之守備弱耳楊惟中與土官安民志同處一司惟中擁兵二千安民志兵止數百民志挺身與鬪惟中避劄鸚鵡失事之罪惟中即萬口無以自解豈獨惟中臣受事半年不能討賊而一上司反爲賊所乘臣亦安所逃罪又何敢以分屬楚信地爲辭續據思南府申據播州逃犯充受吐

稱楊應龍自率賊赴龍泉正月初一日起身初五日至龍泉將本司各寨攻破初六日楊朝棟書來報稱上邊軍馬至急初七日遂回州去訖又據思南府申報正月十三日吏目劉玉鑾自賊營放歸臣惟賊雖稍退而土司已殘吏目劉玉鑾雖已放歸而土官安民志生死未測除殺傷官兵擄掠民人行思石道查實另報外伏乞勅下吏兵二部再加查議將遊擊楊惟中行巡按御史提問正法或念巨寇未滅代者未即至先行革去職銜今戴罪立功以贖日後無功并議前罪帶管分守思仁道叅政郭廷良已承兩院批准交代而行思石兵巡道路雲龍初接帶管未入



思南至於副總兵陳良玘雖云龍泉信地分屬偏橋總兵而總兵官陳璘未到良玘暫爾代庖難以苛責總兵官童元鎮業已督兵貴陽龍泉既屬偏橋總兵信地本官原開遙制雖鞭之長不及馬腹以上各官似應免究者也如臣不職無裨地方伏乞 勅下速賜斥罷別選才望素著者前來代臣以竟厥功庶幾邊圉之任事有人而西南之凱奏有日矣臣無任悚惕待罪之至

報賊襲土官疏

謹 題爲播賊夜襲土官殘害地方事本年二月初九日據防禦劄佐養龍等處指揮夏應龍申報本月初八日申

時據華西司申稱本月初七日申時分據本司把守桃子臺舍人楊鍾走報本日鷄鳴時分被播賊由河渡越江至馬場將防禦官慰宋承恩并親枝各舍包擄去訖殺傷守把土兵賊勢兇勇難敵應合飛報等因到臣據此隨即差官指揮葉天培督領水西漢把王嘉猷等帶兵前去彼處堵截應援續據漢把李勝擒獲播賊梁守富廖華到臣臣牌行貴州按察司審問據該司詳稱梁守富廖華俱係逆酋楊應龍族人楊統從賊稱應龍說宋官慰不與同心令楊朝棟楊三田二領兵一萬前來新土將宋官慰擄去做親同生同死已先於各庄取男女陪嫁等情續據指揮葉



天培千戶范之文漢把王嘉猷等報稱播賊擄去宋承恩  
燒劫龍堰馬勝雍敷等寨楊朝棟接宋承恩至尚溪整酒  
換衣以去竝未創營在彼等情續據指揮夏應龍等獲姦  
細王祥雲南領兵中軍張河等獲姦細王宗文王玉毛繼  
章趙良才毛繼祖等俱稱宋承恩被楊應龍擄去就將女  
結配成親安在上街新橋住坐等情到臣臣看得宣慰宋  
承恩故父宋德賢存日議婚楊應龍之女至今尚未過門  
二十七年十二月據宋承恩稟楊應龍議於二十七日送  
女過江成親臣恐其假名親迎襲我地方督兵嚴拒之已  
不得遂其姦姁又令贊畫官周英協同宋承恩起十二馬頭

各兵阻守河渡乃於初七日夜竟襲承恩以去周英突圍  
而出有言承恩以翁壻之故當應龍未叛時實與往來近  
睹明旨森嚴始與之絕酋憤之而襲以去者有言酋妻  
田氏愛女必欲承恩成親令子楊朝棟襲之以婚者有言  
承恩年幼兵弱拒之不可絕之不可不得已而去者人言  
藉藉俱未可知承恩今在賊中其生死未測其成親與否  
亦屬傳說其失事之罪誠無所逃而其從逆之情未敢遙  
度但三省之師已於本月十二日竝進夾攻逆酋亡在旦  
夕不自悔禍而夜襲土官擄殺邊民權髮之惡所不可言  
搖尾之毒至於此極不寸斬之不足以謝地方除擄殺寨



民另行查實 奏報外伏乞 勅下兵部行臣等并力討  
賊以靖妖氛謹題請 旨

參五開參將失事疏

謹 題為將官輕舉僭事惡苗掩殺官兵謹據實查參以  
肅兵政事萬曆二十八年二月二十五日據湖廣按察司  
辰沅兵備道副使王應霖呈據黎平署印推官丘獻可呈  
奉本道牌該五靖參將黃冲霄督率鎮守備邊上將於  
原調征播哨兵內摘發二百名及令靖州守備張世忠帶  
領五開衛所款兵一千五百名擇於萬曆二十八年二月  
初二日同職前往永從縣駐劄撫綏皮林等寨諸苗當出

火牌傳諭

朝廷恩威今獻首惡餘黨罔治但各苗肆惡

怙終執迷不服各官兵於初四日自縣詣該寨相機挾勘  
值道路崎嶇羊腸險峻至本日午時據潰兵走報黃參將  
督兵行至擒鬼坡被該寨惡苗糾集下皮林頓洞多苗并  
無管生苗裝塘埋伏俟兵經過各苗蜂擁齊出截殺將守  
備陳世忠并五開衛指揮趙國玉劉繼光千百戶張治新  
李承熙邢德唐世臣莫自是楊天時江應潮閔宗騫胡順  
化馬騰雲孔聞韶孟師孔凌善馮時選哨官丘明李高及  
靖州哨領兵千戶楊啓賢莊世恩陸懷忠哨官劉紹尚龍  
珊登時殺死并戮殺多兵亦未查的等情報府至酉時黃



參將亦奔至永從縣中初五日各苗蜂集縣前勒要退兵銀千兩不從即攻城劫官奪印本府與龔知縣見事勢危迫多方善諭令附郭赤沙寨衣巾土生楊永祿勸化諸苗又據五靖哨退兵寫送木刻乞借銀五十兩退苗以保多命等情隨於該縣借出秋糧綿花一千斤并隨帶犒賞銀牌銀花共七十餘兩給與衆苗復勒寫印信承管文帖并豬酒方行解散初六日本府與黃參將龔知縣方得回府次日子時惡苗又將五開衛水井燕窩長春三堡等處盡行燒劫等因詳報到道又准參將黃冲霄手本移報相同案照先奉巡撫湖廣支都御史批據本道呈詳皮林寨惡

苗於擒鬼坡將銅鼓守禦千戶所標舍馬朝弟馬臣及軍餘董應魁殺死行委千戶張正蒙武繼文等會同永從縣知縣龔一慶帶領鄉導詣寨切責苗頭管銀等查勘處分各苗仍前糾衆據險操戈截路拒敵當將軍兵王邦等殺死九名又糾苗夜圍五開衛三舟長春屯堡放火燒燬傅國明等八家殺死軍李明圓并妻吳氏殺傷軍餘楊大付家財牛禾等物一空當該本道牌行黎平府出示曉諭撫處隨據該府呈准黃參將手本回稱皮林寨惡苗肆惡已極理法難容矧今糾衆附勢抗納秋糧合款揚言欲行攻縣至今該縣不敢出入且十二土司諸苗觀望人心洶



溝至於五靖哨兵共有五百七十名俱已整棚齊備衛所  
款兵一千五百名亦已點齊惟候借沅鎮侯兵六百名至  
日一齊舉行煩酌議轉詳等因報道看得惡苗刦殺軍民  
貌法抗勘商民不敢往來縣官艱於出入若不大加懲創  
則一寨狂逞諸苗効尤地方將無寧日候詳轉行黎平府  
查議堪動錢糧移會黃叅將委官召集侯家兵并哨款兵  
及叅守親兵相機挾擒首惡正罪脅從罔治安撫諸苗庶  
獄縣無虞苗酋知警等因通詳奉批惡苗稱亂截殺官兵  
負固不服罪不容於死矣仰道嚴行該府議處錢糧仍移  
會黃叅將督兵挾勘先擒首惡正罪仍撫諸苗無懷二心

繳又奉巡撫貴州郭都御史批上皮林寨惡苗不甚多如  
黃叅將力能制之則專任之但止於擒首惡餘脅從者撫  
之可也仍候楚中兩院詳行繳又蒙巡按湖廣監察王御  
史批惡苗刦殺法所當誅如議行仍候撫院詳示行繳又  
蒙巡按貴州監察宋御史批惡苗肆害逐殺官兵非一大  
創不可候撫院詳行繳蒙此就經牌行黎平府會同黃叅  
將查議糧餉集兵相機挾勘安撫脅從去後今據前因看  
係地方重大事情應合通詳等因到臣據此隨批皮林寨  
惡苗戕殺守備等官至二十餘員此地方之大變神人之  
共憤也不一大創之不足以靖邊圉第楚黔二省方有事



於播勢難兼舉且賊已稍退姑羈縻之俟平播之後提一  
二營大兵剿之易易耳黃冲霄失律之罪已無所逭姑令  
戴罪聽叅推官丘獻可知縣龔一慶姑令解散賊黨少安  
地方仍候楚中兩院詳行去後續據該道呈詳叅將黃冲  
霄既已失事該叅事務應令委官暫署查得原任浙江遊  
擊呂應陽韜鈴素諳堪以署理等因覆詳前來除札原任  
遊擊呂應陽准令暫署叅將事外該臣叅看得叅將黃冲  
霄駑駘末品斗筭小材始當諸苗憑陵既乏綢繆之策及  
至會官勘處竟違撫治之文擅驅孱兵深入虎穴輕信精  
壯逃竄之語遂墮逆苗埋伏之姦致令守備等官盡遭鋒

鏑營哨各卒槩被虐剝失律喪師辱至此極損威釀禍罪  
安所逃所當照例叅治褫職提問以肅兵政者也黎平府  
推官丘獻可求從縣知縣龔一慶未雨既乏桑土之防臨  
事又鮮駕馭之術棄甲而走衣冠維羞登城與盟春秋所  
恥相應重加罰治以警懦庸者也辰沅兵備副使王應霖  
地方雖屬兼轄兵戈豈不與聞但本官以播事孔亟移駐  
偏橋相距五開遠甚勢難遙度且原議止於勘撫不專主  
戰似應量加罰治以責後効者也再照上皮林等寨諸苗  
稔惡有年尾大不掉乘危蝟起怙險鴟張委官查勘宜當  
靜聽處分嘯侶拒討輒敢擅殺官兵日月其愆鬼神弗赦



法當督兵剿治以伸國威第楊酋尚未即殄楚黔之師  
方向夜即且惡苗已漸解散豺虎未翦安問狐狸姑候平  
播之後留一人大將提兵剿處原任遊擊呂應陽照依道  
議暫署五開叅將事陣亡被傷官兵張世忠等容臣會同  
湖廣撫臣查覈的實酌議優恤另報外相應具題伏乞  
勅下吏兵二部再加查議將黃冲霄等分別議處皮林寨  
惡苗姑令府縣暫且羈縻以候剿治庶庸將有所懲創而  
邊圉不甚决裂矣謹題請旨

增設庫吏疏

謹題爲增設庫吏以濟軍需事據貴州布政使司呈奉

臣批據貴陽等府州縣吏鄧壽遠等連名訴稱切照貴州  
夷地初開會省招納川湖吏農多缺書辦故經制未備近  
年土著輸納愈盈缺少大多有一缺而十餘人守候者以  
二三十年計之二考百歲尚難成就及查腹裏府州縣俱  
有庫吏貴州止貴陽一府添設其餘皆無各衙門輪撥候  
缺吏經管更代不常事無專責雖此中錢糧寡少與中州  
有間然出納事體相同乞軫蟻役壅滯俯將七府各州縣  
添設庫吏并各衛經歷司吏一併議建如原撥缺遠願改  
庫叅者酌量收叅遠近照等遞加納銀庶軍需少濟經制  
可全等情奉批國制府有庫吏而縣無庫吏府庫吏准



查明會 題添設縣庫吏仰司再查詳奪奉此又蒙巡按  
貴州監察宋御史批同前情蒙批布政司查可行否報蒙  
此就經移行按都二司守巡安平貴寧思仁新鎮各道會  
議去後隨准各咨牒回覆到司該本司查看得貴州原係  
荒服開拓始自 國朝當時以夷方事簡有司軍衛吏役  
俱未全設或以兩房科歸併一房或以三五事經承一吏  
先年事少人稀名缺相宜乃今地方生齒日繁政務頗多  
以致缺少人多紛紛具訴告改各府應設庫吏一名州縣  
似應添設架閣庫吏一名至於各衛經歷司吏查天大明  
會典原無開載應行免設既經各司道議覆相同且所增

係典吏行頭俱無吏俸紙劄委應准從但查府庫州縣架  
閣庫缺一開首願即得見參如有原撥各衙門吏役缺遠  
難參願改新增前缺者查參期久近遞加納銀合無酌定  
府庫缺首願者應上銀一十二兩次願者應上銀八兩州  
架閣庫缺首願者應上銀八兩次願者應上銀六兩縣架  
閣庫缺首願者應上銀六兩次願者應上銀五兩俱充兵  
餉支用但張官置吏事屬創始請乞裁奪 題請 明旨

至日施行等因呈詳到臣除批仰候會 題外該臣會同  
巡按貴州監察御史宋興祖會看得貴藩初創因陋就簡  
經制率多未備邇來法紀漸張川楚黔民納銀充吏倍於



往昔而各衙門房科缺少不惟兵馬錢糧漫無專責難便稽考抑且候缺多人株守委屬不便據鄧壽遠等訴增吏缺司道會議會同矧黔當師旅煩興措餉甚艱得此涓滴之濟少爲軍興之助查得貴陽府已設庫吏思南等七府似應照例增庫吏一名安順等七州新貴等八縣亦當增架閣庫吏一名專管錢糧以清出納照例不支俸銀紙劄其於公帑吏治兩有裨也相應題請伏乞勅下吏部再加酌議行臣等增設永爲遵守庶遐方冗役可疏而邊餉亦得少充矣謹題請旨

黔草卷三目錄

奏疏

初奏捷疏

查察烏江失事將官疏

再奏捷疏

請免三司入賀疏

三奏捷疏



續衣生點草卷之三

泰和郭子章相奎甫著  
友人楊寅秋義叔甫校

奏疏

初奏捷疏

謹題為大兵初進首摧賊鋒恭報捷音少慰 聖懷事  
萬曆二十八年三月初六日據右監軍右叅議張存意署  
都清道副使尤錫類道左叅政郭廷元王奉督臣及臣  
憲牌播酋犯順 朝廷必誅即今暹卓霧集兵馬雲騰凡  
我文武將吏漢土官兵的於本年二月十二日各照分定



黑州 卷之三  
道路同日竝進開刀剿殺至十日不抵播州等因又奉  
臣牌平越興黃一路出門便是賊境至初興黃兵出擣白  
泥平越兵出擣肆牌共相犄角以圖萬全奉此遵奉依期  
率兵進剿外本月初三日准征播總兵李應祥手本報本  
年三月初二日據副總兵陳寅報稱統領土官蒙詔土舍  
莫勞把總安世珍孫仲謨等探得肆牌叛賊聚集截堵職  
等黎明直抵旋水賊布陣拒敵職將虎兵當先藥弩亂射  
火器銃彈齊發大獲全勝斬獲賊級八十一顆俘獲器械  
不計同日又據原任叅將今充爲事官蔡兆吉統領土舍  
楊治隆土官張元虎把總猶鶴安生等前往天邦圍賊據

險瞭見即出截殺官兵奮勇直前賊敗奔圍官兵架放百  
子銃火箭齊攻登寨斬獲賊級七十三顆同日又據原任  
守備伍萬鍾統領呂守現李正中阿亮等兵攻剿二百落  
圍叛賊山箐險峻賊恃固堵截官兵仰攻被滾石拔杆不  
能遽上隨該本鎮標下原任守備柳國柱中軍官張奇盛  
易之謙百戶李師沅汪世才等率同領兵把總華統吳文  
秀宋世臣等部兵從後路偷上火箭銃炮齊發賊力不支  
前後夾攻當陣斬獲賊級六十一顆各兵見在搜剿山箐  
等因先該本鎮偵得逆酋楊應龍選差張文相朱敬董教  
郭倖冉坐寨等起集肆牌并河內賊衆拒敵官兵雄據三



因屯劄肆牌恃險勢重又據出哨兵士拏獲馬賊一名阿林供報賊欲早晚襲糧隨該本鎮統督官兵酌定緊要進止為營四山揆伏挨次前進今據攻破險困通共斬獲賊級二百一十五顆俘獲賊屬一十七名口賊仗器械五十三件到職職隨公同紀驗官同知徐廷綬知州李珏陳聖佐於本營查驗明實合行呈報等因同日准總兵李應祥手本到臣亦同前事又據副使充錫類呈本月初四日據都清守備汪如淵稟報本月初二日職督官兵劄青池令把總張鶴狎許攀龍等帶兵梭山直抵肆牌有草塘松坪浪杵播民楊世祿等原順劇賊謝朝俸今見大兵已進攜

家二十九名口出降令充鄉導報効同日又據貴陽監軍按察使楊寅秋貴盛餉道奉參議梅國樓都司僉書標下遊擊將軍張秉忠呈據泗城州土知州岑紹勳指揮李懋樞申報本月初三日率兵前去鰲子渡遇賊用火箭射焚賊房四間初四日土官男岑雲漢兼同職家兵張宗義等前去河渡關用火箭射焚隔岸賊房八間米二倉射死賊三名射傷二名本夜伏兵關下裝塘至五更時候遇賊在隔岸巡邏當即浮水前去對賊血戰斬獲賊級一十八顆呈解前來該職驗是真正賊級當即發醃熏類解同日又准貴州總兵今充為事官童元鎮手本亦同前事各緣由



飛報到臣臣札行兩監軍道會同各道驗明照格行賞楊  
世祿等准充鄉導立功外案照先於本年二月初九日據  
思石兵道副使路雲龍呈據婺川守備徐允爵申報正月  
十七日播賊數千聚石樑水天坪劄營將攻圍本縣職率  
兵追捕至石橋關殺死賊兵無數俱被搶去止奪回擄去  
生員良民朱國賓等男婦二十餘名口俘獲牛馬四十隻  
斬獲賊級一顆生擒一名二月十五日據畢節兵道副使  
洪澄源呈據宣慰安疆臣報稱播民黑老虎等攜帶妻小  
共一百一十三戶過渡投降即安插內地李毛地方量給  
衣糧二月二十三日據副使路雲龍呈據思石守備楊惟

中呈賊首冉崇學藍大藍二等統苗屯劄三跳水職發兵  
搗巢當陣斬獲藍大等二十五級馬二匹斬刀三把弩一  
張長槍四枝虎槍三枝紅絮被一衾并奪回被擄民王良  
臣男婦二十七名口已而苗賊復出把總李君寶楊第督  
兵血戰斬獲賊級二顆又獲刀槍等物二月二十九日據  
副使洪澄源呈據宣慰安疆臣師至烏慶水令日把丁良  
茂等招獲擄帶妻小播民阿蒙等六十八戶暫行安插三  
月初四日據辰沅兵道副使王應霖呈准總兵陳璘手本  
稱二月十三日於大塘地方生擒苗徒吳阿保審係肆牌  
播童來探湖廣兵馬十五日早遊擊陳策千戶張金把總



何棟吳應龍李元敬朱萬乾吳嘉隆張文爵等督兵共擒  
斬賊三十五名顆俘獲賊屬二十八名口初五日據副使  
王應霖呈准總兵陳璘手本稱二月二十七日申時本鎮  
親統諸部官兵進次龍溪地方遇賊來敵躬督遊擊陳策  
都司吳時喬守備白元潔王之棟陳九經保靖司應襲彭  
象崑等率兵奮勇向前通共斬獲賊級九十一顆奪獲賊  
仗各等因轉報到臣臣除將投降苗民隨宜安插獲功員  
役應賞者分別獎賞應叙者聽候并叙外該臣會同總督  
川湖貴州軍務兼理糧餉巡撫四川地方兵部右侍郎兼  
都察院右僉都御史李化龍看得逆酋自拒 命以來肆

牌之地奔爲賊墟烏江一衣帶水視若天堑黔陽官兵不  
得入肆牌而渡烏江蓋六七年於茲矣又姦細之往來甚  
易黔中之虛實盡知以故東西狂逞彼直以爲官兵易與  
耳茲者大兵四集即烏江平越二哨不下六萬餘人臣等  
猶以爲薄也在平越令合興黃之師共擣白泥以及肆牌  
故兵勢稍厚賊遂不支三圍既拔肆牌可復在烏江新調  
泗城之兵結營河渡以防夜襲雖功不甚多亦足少爲諸  
路之倡而寒逆賊之膽矣是役也總鎮監軍各道叅遊親  
行營壘漢土官兵併力用命同知徐廷綬知州李珏陳聖  
佐惺壽居多土知州岑紹勳土同知蒙詔土舍莫勞楊治



隆先登足尚其功均有不可泯者臣等不敢不以 上聞  
伏乞 勅下兵部待播平之日總爲覆議施行謹題請  
旨

查叅烏江河渡失事將官疏

謹 題爲烏江河渡二關連克不守謹查叅失事將官以  
重軍機事本年三月十六日據左監軍按察使楊寅秋稟  
報三月十五日戌時據河渡統兵都司張秉忠報本月十  
四日夜因擒播姦細搜出公文已知賊來衝營預令部兵  
加謹慎防并一面請兵應援去後十五日未時播賊數萬  
突然而來雲南官軍先殺一二陣敗走過河泗城官兵初

尚劄住以俟交鋒後虞糧餉積在老寨尤恐有失遂即收  
兵回守糧餉并分兵把截渡口因而損失士兵三百餘名  
等因馳報到司除會同總鎮星催鎮雄隴兵策應催水西  
安兵邀賊歸路一面直搗巢穴牽賊內顧及督泗城滇兵  
劄營外等因呈報到臣隨行各將官督兵加意隄防劄營  
去後十九日據統兵雲南中軍張澍稟報十五日賊兵數  
萬滇兵沅江寧州羅平迎敵以象先衝摧其先鋒賊遁走  
斬馘詎料無援兵象奮不顧身淹溺督陣官何天慶名色  
把總耳靖方朝宗楊王王彥緯哨長許應元奮勇衝鋒各  
手砍逆賊數人中槍而死餘各陣亡衆寡不敵領兵指揮



胡珠等冒陣而出損傷官兵千餘收回餘卒劄守老營等  
因本月二十日又准總兵童元鎮手本移稱本月十七日  
寅時據總領求靖哨原任參將楊顯稟十六日午時求順  
兵出哨至推水遇兵稱係安兵相約會哨各有旗幟把目  
管帶田意在十八日起營等情本鎮正疑慮間隨准左監軍  
面會此必賊詭謀假冒號頭亟傳令諭適據壩陽守備陳  
雲龍報探得播賊馬步兵不計其數前來衝突即同左監  
軍飛騎臨河親督各哨抵敵連對三陣至第四陣賊勢益  
衆所執旗號即先日會哨管帶旗幟求順中哨驚亂麾令  
督陣等官拔刀不能禁止壩陽兵等相繼奔渡浮橋當有

一人走過砍斷橋纜隊兵俱各浮水不能水者淹沒無數  
原任參將楊顯守備陳雲龍白明達阮仕奇等俱陣亡及  
該本鎮召集各兵另行相機進剿擬合馳報等因又據左  
監軍按察使楊寅秋報同前事據此案照二月十二日據  
左監軍按察使楊寅秋呈本月十一日巳時據守備陳雲  
龍白明達阮仕奇求順宣慰使彭元錦目把彭永賢等各  
飛報本日辰時該雲龍督率壩陽兵明達仕奇求賢等督  
率求順兵奮勇爭先搶渡烏江關賊衆乘高崖坎拒敵擊  
石俱發急難傍岸官兵用竹牌遮蔽船上崖邊烏銃對打  
求順壩陽兵先登各賊破山奔潰官兵直衝烏江關縱火



登時焚燒附近關邊賊寨燒掃一空煙蔽十里陳雲龍部斬賊級十顆永順彭永賢王道等部斬賊級九顆餘賊奔逸官兵奮追十里不敢深入十三日據左監軍楊寅秋呈報本月十二日午時據河渡統兵遊擊謝崇爵雲南中軍張澍守備沐黎督書黃龔飛報本日卯時發兵奮勇渡江各賊約千餘拒敵官兵統督俱發併力先登奪占河渡險關燒蕩各寨當陣生擒賊五名斬賊級二十三顆又頂皮功二顆餘賊四逸奔潰連日各官兵攻打鬼國等處擒斬賊一百三十一名顆連烏江河渡共擒斬一百八十名顆各等因到臣臣惟烏江河渡二關原稱天險賞格開載能

先登烏江者陞三級賞銀千兩官兵二日連破二關不可謂非矢力先登但斬獲頗少臣不敢專題自二關既破爲各路倡破竹之勢可以直搗不謂烏江距播止六十里投足即係害地而各路兵未能一一即至逆賊得以全力獨衝我兵以故十五十七二日我兵失利陣亡將士損傷官兵除臣查實另報外該臣看得總兵童元鎮始以觀望道途逗遛銅仁不入貴陽失在懦弱今以奮勇破關不能禦賊爲賊所破失在輕率顧破關之功竟成畫餅而戰敗之罪遂至塗地原奉部議童元鎮充爲事官管事如尚在觀望即以聽用總兵李應祥補之今累敗之後心志俱灰



號令不行此一臣者當即行罷斥代以李應祥者也遊擊謝崇爵本以承乏而起假爲鄉導之帥茲以望風而遁難逃失律之罪都司僉事張秉忠管理泗城兵而賊至即退中軍張澍督率雲南兵而一戰輒北此三臣者內謝崇爵力窮計阻亟應罷革另換張秉忠張澍宜重加罰治姑令戴罪立功者也監軍按察使楊寅秋到任僅三月餘拮据不辭平羊腸距賊不二百里踪跡親踏於虎穴即近日兩關之克皆其鼓舞之力而水西搗巢之舉又其指蹤之謀諸將雖云失利本官亦與有責此一臣者所當量罰或嚴行策勵以責後効者也至於臣子章本以書生未諳軍旅

連破險關未能固守義當首罷以謝三軍除臣席藁待罪外伏乞 皇上勅下吏兵二部將童元鎮等分別議處將臣急行罷斥庶幾軍政一新強寇可滅矣謹題請 旨

再奏捷疏

謹 題爲漢土官兵奮勇連克險關俘醜斬級乘虛進搗賊巢事本年三月十二日據左監軍按察使楊寅秋呈本月十一日巳時據守備陳雲龍等永順宣慰使彭元錦目把彭宗卿彭永賢等各飛報奉監軍總鎮親臨烏江分布哨渡整備船隻銃彈火器定限十一日齊力渡江進剿賊兵千餘四山伏草出沒沿江發犬叫話猖狂本日辰時該



雲龍督率壩陽兵宗卿永賢等督率永順兵奮勇爭先搶渡關嶺險絕水勢洶惡賊衆乘高崖坎拒敵弩石俱發急難傍岸官兵用竹牌遮蔽船上崖邊烏銃對打永順壩陽兵先登各賊破山奔潰官兵直衝烏江關縱火登時焚燒附近關邊賊寨燒掃一空煙蔽十里陳雲龍部斬賊級十顆永順彭永賢等部斬賊級九顆永順兵陣亡一名被傷五名壩陽兵陣亡苗兵千總一名被傷四名餘賊奔逸官兵奮追十里不敢深入十三日據左監軍楊寅秋呈報本月十二日下午時據河渡統兵遊擊謝崇爵雲南中軍張澍守備沐黎贊畫黃龔飛報本日寅時奉監軍手令總鎮飛

傳大兵奪烏江關割營關上河渡各哨即便渡江攻打河渡關以分賊勢本日卯時發兵奮雷刀渡江各賊約千餘拒敵官兵銃弩俱發併力先登奪占險關燒蕩各寨當陣生擒播賊五名斬獲賊級二十三顆又頂皮功二顆餘賊四逸奔潰又據永順舍把彭宗卿王有富尚禎於十二日寅時督兵出哨至鬼囤白羊壩遇賊百餘設伏彭志孝等斬獲賊級三顆獲婦女二口孩子一名彭枯牛等斬獲賊級三顆獲婦女一口各賊奔散巢穴盡焚又據標下游擊將軍張秉忠呈報十二日卯時同泗城州土知州岑紹勳勇岑雲漢指揮李懋標督兵前至磁竹渡火箭箭鳥銃齊發自



辰至申尚稽一路賊寨營房盡行燒燬賊奔遁後山止斬獲賊級一顆紹勳隨即督男雲漢尾追申時至鬼囤奮力攻打復拔鬼囤斬獲賊首余有忠首級一顆從賊四十五顆生擒賊四名各賊奔竄續據遊擊張秉忠移報泗城土兵又於盧家水及白羊囤與賊血戰二起共斬賊級六十一顆生擒一十三名通計前後共擒斬一百八十名顆各緣由飛報到臣又准貴州總兵今充為事官童元鎮手本又據貴州總兵左叅議梅國樓紀驗委官雲南廣南府知府黃宇各報相同十五日據遊擊張秉忠中軍張澍報稱本日播賊數萬衝突河渡關雲南兵與戰不利折兵千餘

泗城兵渡河淹死三百餘人十七日據左監軍楊宙秋報稱播賊復衝烏江關壩陽永順兵失利淹死無數隨該本司會同總鎮慈催永西鎮雜兵前來採援邀賊歸路或徑搗賊巢牽賊以解一關之危等因續據宣慰安疆臣報據督兵目把陳恩張峴等稟報十八日奉揚監軍今本揚應龍父子敵散河渡烏江官兵責令貝等議撥以白標得蘇魏良海等督兵一枝徑往地名青塘水等路堵截應龍歸路去後陸續報稱正遇賊兵回歸在於青塘水截殺一陣各目兵奮勇殺死偽內官一人賊頭苗兵共一百二十餘人鞍馬五副槍弩劍刀綿甲腦包共八十五件檳榔



一搭連生擒張受吳受老彭老青等一十九人餘賊萬衆倚菁崑險各目兵不敢梭山今將生擒張受等隨審各稱係同楊應龍前去河邊趕殺官兵就要過河聞得水西大兵已到內地慌忙轉回撞遇各兵衝殺被擒等情將所獲器械給兵收領其各賊級候獲元兇之日方割另解生擒賊兵十九名呈解本司轉解畢節道外等因稟報到司合行轉報本日又據右監軍右叅議張存意帶管都清兵道副使左錫類糧道左叅政郭廷良新鎮守道右叅議張文奇呈准總兵李應祥手本據副總兵陳寅報稱奉令統率土官蒙詔舍把莫勞守備汪如淵等漢土官兵於二月初

七日三鼓出營往肆牌高圍攻剿賊千餘下圍拒敵突戰官兵用火器衝擊斬獲賊級一百零五顆重傷馬兵阿顧等十二名輕傷兵朱旺等八名陣亡兵阿舉等九名奪獲賊仗六十一件俘獲賊屬十三名口餘賊奔走回圍該標下坐營原任守備柳國柱中軍張奇盛督率把總吳文秀李師沆等部兵帶火箭烏銃從後偷上銃炮震天本鎮督把總華統宋世臣朱運昌張翀等策應前路嚴督陳寅部兵併力前後夾攻賊力不支官兵奮勇斬獲賊級二十七顆當令撫民黎烈認係向平龍向老五苗頭曾殺潘經歷首惡其餘跌墜崖菁不能拔級者不計俘獲男女八名



口奪獲與仗二十一件輕傷兵的王等四名重傷兵老文等五名又據領兵爲事官蔡兆吉奉令統領把總猶鶴戎茂才土舍楊治隆土指揮張元虎把總楊通需安宇等部兵同督陣官馮化把總汪世才等前剿龍水囤賊紛來截殺官兵奮勇抵敵賊奔走上囤跟追接戰四陣隨有守備伍萬鍾率領土官楊燧把總呂守現葉逢春等從小路攀崖一舉放銃炮前後攻圍賊力不支蔡兆吉部斬賊級十六顆伍萬鍾部斬賊級十四顆連前通共斬賊首級一百六十二顆生擒賊二名俘獲賊屬二十一名口器仗八十三件共重傷兵十七名輕傷兵十二名陣亡兵九名迄今

官兵屯劄疆界河其河內肆牌賊首謝朝俸等巢穴及盤據有名險固俱已攻破剿滅合就移報到道准此合行轉報等因到臣又准總兵李應祥手本移報相同同日又據左監軍楊宙秋副使洪澄源叅將朱鶴齡呈據宣尉使安疆臣呈報沙溪營目把陳恩張崑李輔同罵色丁良茂沙卒等於十三日寅時督率各兵分路進取播賊苗頭王阿賽督苗把守新關阿秋阿二得等奮勇登濠上關發弩射死五十七人射傷四十三人隨放火箭燒關賊逃深菁我軍破柵平塹決堤取間道破傳頭石壁一帶關隘又頭目阿五等打破大紅關及兩路口一帶坑塹射退苗賊阿架



等殺死三十四人餘賊俱逃頭目柯阿箇等克破胡石口各關攻破黑水關射殺守關仲賊李從正等四十三人我兵衝傷六名俱同阿秋阿五等於本日申時齊到水坎五里臺山口屯劄等因准總兵童元鎮手本移報相同十八日又據左監軍楊寅秋副使洪澄源叅將朱鶴齡呈據水西大營領兵目把陳恩等飛報於十五日巳時攻破板山圍射殺賊兵一百三十人苗頭十二名本道義民官李武帶兵併力進圍斬苗頭阿王一名苗賊阿二阿右二名俘獲賊兵二名楊冬受鍾宣餘賊奔菁各目登圍傳諭招撫在圍民戶老幼婦女六百房計一千四百三十五名口隨

近聚住待事定安挿原業同日又據鎮雄府土知府隴澄揭報十二日本府督把事王嘉猷領兵由李稍塘進攻播賊迎敵我兵奮勇殺死賊十七名於十四日攻苦竹關殺死苗賊二十五名追至平頂關復戰斬首二十名各賊奔走關我兵自午至酉殺死賊頭二名餘賊三十二名十九日據右監軍張存意呈准總兵李應祥手本移稱據為事官蔡兆吉報於十二日官兵抵青岡圍叛賊出敵領兵把總猶鶴等奮勇陣斬賊級三十七顆賊敗回圍據險至十三日黎明官兵克圍斬賊級通共二百二十三顆生擒謝王保等二十六名俘獲賊屬男女七十八名口奪獲器



仗二百三十一件奪獲被擄男女六名口同日據湖廣辰沅道副使王應霖左監軍胡桂芳右監軍魏養蒙呈准備橋總兵陳璘手本稱二月二十七日督兵攻打龍溪山斬獲賊級九十一顆餘賊遁入肆牌保兒圍被傷哨官一員官兵三名奪獲賊仗二十七件次早發兵追賊至袁家渡各賊對敵不過我兵斬獲賊級一百二十二顆生擒賊級二顆俘獲賊屬男婦八十四名口沙水牛一百零一頭賊仗六十四件官兵陣亡四名被傷二十七名十九日據湖廣左右監軍丁胡桂芳魏養蒙副使王應霖呈准總兵陳璘手本稱二月初六日督兵於乾溪坪與賊接戰數日互

有損傷各兵奮勇衝鋒兼用火器賊敗當陣斬獲賊級五十九顆奪獲賊仗十件沙水牛三十二頭俘獲賊屬二十三名口陣亡兵一名被傷兵七名餘賊逃竄本月二十三

日據左監軍楊寅秋副使洪澄源參將朱鶴齡呈據鎮雄府報本府兵十六日自刀靶水移營至雷打舖陡被賊兵數千截路迎敵前哨各兵奮勇衝逐殺死二百四十七名各賊敗退徑追過新站倒戈投降二百五十三名就於本站屯劄至戌時賊復衝營我兵出殺死苗頭阿曲等五名餘賊一百二十九名擒獲苗賊阿易吐稱應龍知道鎮雄兵至新站隔州不遠已將兵三萬在大水田埋藏接路先



叫我苗兵五千來衝營是實當將本賊斬訖就經與漢把  
王嘉猷較議明揚往大水田搗巢暗督兵由野里坎陳世  
田小路破大夫關徑抵馬坎截其後路去訖除將斬獲苗  
頭首級五顆解赴監紀官驗明轉報二十四日據宣慰安  
疆臣報據督兵目把陳恩張崑李輔等報稱十九日夜四  
鼓賊兵前來劫營我兵奮勇射殺賊兵數多生擒彭四等  
六名得獲槍弩綿甲腦包共十五件我兵亦多中傷同日  
據左監軍楊寅秋副使洪澄源參將朱鶴齡呈據宣慰安  
疆臣飛報十九日辰時據本司目把柯阿個阿五陳恩等  
揭報各目兵蒙主官母子差親信目把阿石齋執諭帖到

營諭稱本衙非眼疾當親督進取見蒙部院軍門按院左  
監軍各司道諭檄爾等已破三關當乘勝搗巢擒斬元兇  
奉此即會各目同兩省督陳軍於十六日寅時分兵三哨  
進攻至揚亡水遇偽提調楊廷章劉惠領賊兵由兩小路  
抄出衝擊我兵大殺一陣頭目阿戶部斬賊一百五十三  
人頭目以箇等部斬賊六十七人苗頭五人雲南武定府  
頭目李保親斬苗頭一人部斬苗兵五人餘賊逃竄我兵  
中傷二十三入隨即督兵盡渡揚亡水當日申時兵目俱  
抵浪頭壩離落濠水大關三里創營又獲細作阿敗報稱  
楊劉二賊奔回落濠較殘賊拒守報州起大兵接應本夜



要來偷營除嚴諭各營日兵加謹防範合先稟報據此看  
得五關連破諸隘已平嚴示各目遵照部院憲檄務於本  
月二十日直搗州城白田壩不許違悞同日據左監軍楊  
寅秋副使洪澄源參將朱鶴齡報據宣慰安疆臣報稱本  
月二十日午時據沙溪路督兵目把柯阿箇阿五陳恩張  
崑李輔華報稱本司大兵於本月十六日戰勝楊亡水進  
割浪頭壩隨奉發牛犒賞聚眾議得落濠水雄鎮前跨深  
溪後倚大菁楊應龍設立深溝險塹三層鹿角排柵環築  
重牆當發兵一枝由上落濠水抄出樵村一枝由下流出  
金鼓塘伏下大兵從正路直攻關前舉炮彼此夾攻方可

取勝各目應允回營至夜賊兵劫沙卒營本日傳令兵士  
伏硬弩於排柵下等候賊兵近營眾弩齊發射死賊兵六  
人餘賊仍回落濠關去訖彼該頭目柯阿箇領兵由上落  
濠出張村沙岡頭目那拱等同督兵官領兵出益山池平  
壩偷渡抄出關後三哨各放炮盡發賊兵棄關奔走當本  
枝日兵追趕殺賊三十五人千戶王三錫親斬苗賊一名  
百戶李大業親斬苗賊一名姚可興親斬苗賊一名餘由  
小路回州訖當令前鋒將第一重關門破毀將溪水修搭  
浮橋我兵盡渡於樵村三哨會合星八里水大水田割營  
發兵一枝攻燒桃溪衙後山母氏囤發兵一枝出毛蓋山



大夫霸與鎮雄兵會哨約期分路進攻外看得楊酋恃關  
疊障堡強負固今照落濠關為播咽喉險倍各隘賊失落  
濠是失播矣今本關已破元兇寒心授首可卜也復視其  
大水田庄宅制度甚沼亭榭僭越非常不惟雕刻綵飾龍  
鳳等物即卧床一樣黃色牙床三十六張欺僭可知等因  
同日又據右監軍張存意副使尤錫類左叅政郭廷良右  
叅議張文奇呈准總兵李應祥手本移報三月二十一日  
據副總兵陳寅報稱土舍楊治隆中軍孫仲謨等南丹平  
州土兵於夜半由構皮灘渡河伏於山後本職親領把總  
家丁陳定等獨山州兵於袁家渡過河用火器打開分兵

齊進當陣斬獲賊級四十六顆同時本鎮親督領兵官商  
民瞻等官兵在於水旋渡架放火器齊進當陣斬獲賊級  
一百一十一顆隨據保靖宣慰彭養正凱里土官楊燧守  
備伍萬鍾汪如淵各報督兵於是日五鼓在江界河與賊  
對敵至辰巳時分諸兵奮勇登岸當陣斬賊級三十一顆  
又據爲事官蔡兆吉報稱是日領兵把總猶鶴等領兵由  
吳歪渡過河由孫家渡找搭牌筏渡河敵殺賊衆披靡退  
走上山當陣斬獲賊級四十一顆各該官兵一面攻殺一  
面搭橋抵夜該本鎮傳令各哨官兵就於賊岸創營兩岸  
屯劄首尾救應防賊乘勢衝劫務求萬全通共斬獲賊級



二百二十九顆俘獲賊屬一百二十三名奪獲賊仗九十  
二件諸葛銅鼓二面奪獲被擄男婦一十七名口輕傷兵  
三十四名重傷兵五十一名陣亡領兵哨官劉廷宗兵馬  
長子等一十七名各等因飛報到臣節准總兵今充爲事  
官童元鎮總兵李應祥手本各移報相同除批行黔楚監  
軍各道行紀驗官查驗功級明的給賞捐傷陣亡官兵候  
覆覈議恤奪獲賊屬牲畜變價充餉投降人民隨地安插  
外該臣謹會同總督川湖貴州軍務兼理糧餉巡撫四川  
地方兵部右侍郎兼都察院右僉都御史李化龍看得狡  
酋竊伏草澤長江爲界頻年狂逞漸侵內地疆界河之東

僞提調謝朝俸營而穴之刈薙爲難迺茲半月擒斬絡繹  
旋水之捷已足清肆牌之涂高固之勝又足洩飛練之憤  
則總兵李應祥右監軍張存意副使尤錫類之功也合掃  
肆牌勢既成於破竹接戰乾溪勲立睹於折箠則總兵陳  
璘左右監軍胡桂芳魏養蒙副使王應霖之功也若乃烏  
江河渡二關上插雲霄下瞰江渚苦竹大紅落濠等七關  
削壁斗絕垂藤蔓延逆賊倚爲天險兇徒馮爲高墉仰攻  
方且難於斬關深入豈遂易於搗巢左監軍楊寅秋副使  
洪澄源躬授方略於虎穴總兵童元鎮參將朱鶴齡親冒  
矢石於烏道九關連克諸險盡夷亦足稱長驅先登矣所



恨烏江河渡既克不守官兵損折數多臣另有疏題然二關不克賊不出巢併力衝突水西鎮雄之兵安得乘虛突入直抵桃溪衝攻彼母氏困則諸將失利之罪誠無所逃而拔關之功臣不敢泯若左監軍楊寅秋轉敗爲功尤極苦心焦畫者也宣慰使安疆臣鎮雄府土知府隴澄督率貔貅之衆蹂踐豺虎之境克七關而不以克關爲奇斬千級而不以割級爲功誠能永堅初心毋懷二念則先登除兇之功誰能掩之而又誰能以臆見排妬之第元兇未縛全局未收所當責成畢力殲狡酋而後朝食以膺懋賞者也目今將士用命之秋臣不一爲具題不足以作

敵愾而揚先聲伏乞勅下兵部待播平之後總爲查明覆議施行謹題請旨

請免三司入賀疏

謹題爲慶賀事據貴州布按都三司會議呈稱萬曆二十八年八月十七日恭遇萬壽聖節例該各司堂官各一員預期齎捧表文赴京慶賀今查布政司左布政使應存卓見掌司印督糧道左叅政郭廷良督理通省軍前糧餉分守貴寧道左叅議梅國樓督餉烏江分守新鎮道右叅議張文奇督餉平越分守思仁道按察司副使兼右叅議陳與相督餉龍泉按察司按察使易登瀛見



掌司印驛傳道副使充錫類帶管都清兵巡道督兵平越  
 畢節兵道副使洪澄源督兵沙溪思石兵道副使路雲龍  
 督兵思石提學僉事徐來儀見在巡歷考校威清都清二  
 道副使袁應文王邦俊俱未到任都司掌印署都指揮僉  
 事王納忠督兵守城操捕署都指揮僉事張秉忠烏江督  
 兵見今寇在門庭尚未騷除見任各官俱有掌印督兵理  
 餉守城之責似難離任及查嘉靖四十年四十二年隆慶  
 元年二年五年萬曆十七年二十三年因缺堂官詳委首  
 領經歷知事照磨趙謨孫江劉沛黃誥黃文獻葉奕光舟  
 崐等齎捧代進今布政司經歷江師周按察司經歷范

應揚都司經歷劉苗各在任堪以委代等因到臣查先  
 准禮部咨內開齋進慶賀表文如遇二司缺官或  
 地方用兵差占許改差首領等官前來行禮巡撫巡按官  
 先期奏行禮部查考等因備行遵照訖萬曆八年九月  
 內准吏部咨該本部題奉聖旨今後二司官凡奉勅整  
 飭兵備有地方責任的不許夤緣進表規避誤事者該科  
 查參處治欽此欽遵等因備咨前來案行各該司遵照去  
 後今據前因該臣會同巡按貴州監察御史宋興祖議照  
 海內諸臣恭遇萬壽聖節莫不踊躍奔走願赴祝慶  
 之期但貴州地方正值播賊狂逞奉旨征剿集兵十萬



三司各官掌印守城理餉督兵無頃刻寧况龍泉永寧二  
哨猶借川湖司道督兵者四郊多事委難離任謹遵地方  
用兵差占許改差首領等官事例行委三司經歷江師周  
范應陽劉苗各恭行齋捧表文赴京慶賀外謹題  
請旨

二奏捷疏

謹題為仰仗天威土兵併力血戰大破賊兵恭報大  
捷事萬曆二十八年四月初三日據左監軍楊寅秋呈據  
烏江哨領兵官鎮雄府土知府隴澄飛報三月十三日鎮  
雄兵過李稍塘連破苦竹等關直抵賊巢大水田屯劉與

水西兵合至二十九日逆酋楊應龍父子因恨鎮雄斬其  
來使首其魏儀遂親領賊七萬分作五路由馬坎羅會水  
落潮等路前來迎敵該水西目把王嘉猷陳恩柯阿箇阿  
五等預為準備當即分兵七路夾衝策應自本日卯時至  
申時鏖戰該隴澄親督兵略陣衝殺賊兵大敗殺賊首提  
調把總頭目五十餘人內有偽內官五人斬應龍弟肆子  
楊惟棟殺賊萬餘不可勝數屍盈崖谷血漲溝渠我兵損  
折百餘中傷二百餘名我兵乘勢直搗逕破播州城桃溪  
衙等處去訖賊已喪膽餘兵大半潰入海龍國惟候四路  
兵至十面攻圍擒斬渠魁實在目下請乞嚴行各路官兵



乘機竝進給餉接濟以收萬全等因本日又據左監軍楊寅秋畢節道副使洪澄源參將朱鶴齡呈據貴州宣慰使司領兵官安疆臣報稱本司大兵自入播後破關擒斬捷音案經不次呈報外職因患目喪女先經封刀一把功簿一扇付親信目把阿實者怯臨營督率去後復思師久變生力疾馳驅於四月初一日至上庄隔播一江搭架浮橋直抵播地安營間據督兵目把柯阿箇阿五王嘉猷陳恩張崐李輔箇仲等稟報我兵自劄大水田連日陰雨至三月二十八日略晴稟鎮雄府隴知府會議進攻間二十九日兇賊楊應龍父子大起苗兵七萬親督分作五路由馬

坎羅會水落潮高了前來母氏圍前批戰蒙隴知府會集我司目把等分兵七路前去夾攻自本日卯時殺到申時見賊不退衆目賈勇兵卒愈奮殺死當先賊首提調把總五十餘人內有偽內官五人各路共殺賊兵萬餘屍橫遍野前五十人內有一人全身綃段金銀器械查係賊子惟棟待查的又報外比就欲乘敗追趕賊衆已奔上母氏圍由小路潰散天晚收兵歸營飛報到職據此看得卑司目兵自入敵境擒斬雖多尚係把關守圍賊黨此番應龍父子親率大兵分哨迎敵我兵會同鎮雄兵大敗賊衆偽內府把總俱賊心齊駢首就戮惟應龍抱頭鼠竄非仗天



威震懾何能至此請乞速發糧餉協濟嚴催各路兵馬刻期並進不勝延頸佇望等因初四日又據左監軍楊寅秋呈據安順州土司溫希舜飛報稱卑職同水西把事王嘉猷隨隴知府屯劄大水田二月二十九日賊眾數萬前來衝營我兵奮勇大戰殺賊萬級職斬獲賊首六名生擒一名何老係賊把總黃茂松部下馬兵合行呈解又據養龍權司蔡應朝報同前事二十九日辰時被楊酋父子統大兵偷破大營自辰至未殺賊萬餘應朝斬獲七顆等情各報到司該本司審得何老供係播州民克黃茂松馬兵十五日隨應龍攻河渡烏江十七日聞鎮雄兵衝出新站慌

忙奔回龍崖圍商同各偽提調稱水西馬兵難抵不要與他戰只要求他回軍因水西兵只見添不見減辦送下程等物講和被安三將差人斬訖又探得頭營內有七姓逃民在內應龍忿怒發軍先衝頭營放火安兵警覺將放火人殺死楊家大兵隨進兩家自辰時大戰因柯官兒兵狼至未時楊兵奔潰安家馬兵包趕只見殺死不計其數填滿崖孔應龍第四子約年二十五歲殺死是的鞍馬銀刀俱被水西得了水西兵亦損傷等情初五日又據左監軍楊寅秋呈據宣慰安疆臣報稱四月初一日據督兵目把柯阿箇等飛報三月二十九日大破播賊緣由立刻飛報



間所據賊首姓名俘獲及我兵被傷數目倉忙查據未的  
不敢妄開初二日丑時據柯阿箇陳恩李輔王嘉猷等稱  
箇等殺敗楊酋天色昏晚兵士勞倦各歸營房三十日將  
生擒賊犯審問據稱應龍自見我兵進大水田後只是拒  
險固守不戰要與水西講和退軍因水西兵日見增添鎮  
雄殺他送禮差人又恐官兵齊進難抵遂於二十九日放  
兵衝抵內被殺騎大馬銀鞍的係應龍第四子楊惟棟被  
殺爲內府五人係喜受觀受劉元長受六受爲提調把總  
係朱洪楊廷柯梁天四高良顏義苗頭係朝貴老大羅三  
等其餘屍骸填溝堆箐漫山寨野遍認未週查點我兵二

處損折二百餘名重傷三百餘名輕傷五百餘名內柯阿  
箇二男普鬪魁痴各被箭傷奪獲大馬一匹銀鍍鞍一副  
金銀鍍刀一把戰馬八十餘匹鋒利副刀槍弩千餘件綿  
被腦包血污丟地不計其數探得賊破敗後退長江水屯  
劄我軍就欲追殺柰馬坎高了一帶賊將大樹砍架成樓  
堵塞又且箐深路險溪水未消難以輕動隨差漢把吳昇  
通事鄭子周帶領驍卒連夜由小路截入桃溪新庄後庄  
清水塘一帶房屋縱火焚燒使賊驚疑內顧賊見各處火  
起煙焰蔽天由長江水撤回州困屯劄去訖今見在整兵  
勢欲死鬪稟乞早賜轉達速催各路夾剿催糧救命等情



到職看得目把前報殺死賊首全身金銀器械者的係楊應龍第四子楊惟棟其偽內府偽提調俱各真的無偽今日兵有進無退請乞軫念臨湯赴火發兵發餉刻期接濟等情先後各報到臣又據總兵充爲事官童元鎮手本移報相同案照本年四月初二日據左監軍楊寅秋呈據沙溪水西營督兵目把陳恩等稟報本司兵劄大水田母氏困下三月二十四日雨霽霧開探得賊兵埋伏近營長箐欲來衝劫西邊營壘議得若不按緝恐我兵進州躡後不便於本日本司發兵一營會同鎮雄一營圍箐按剿賊兵拒險伏射將鎮雄督兵冠帶把總陳啓禮射殺隨軍亦傷折多命衆兵奮勇攻進殺賊五十餘名賊兵奔入大箐天復大雨難以涉渡窮按暫撤回營其所斬獲苗頭首級已該府解報除一面隨後會議進剿等因飛報到司看係賊兵據險設伏射殺把總我兵奮勇追殺斬獲多賊事理理合揭報初三日又據左監軍楊寅秋呈據鎮雄府揭稱三月二十六日據無知頭目引播差二人齎書儀并騾二匹赴營投見當拆來書驗係楊應龍妻田氏餽送下程禮單該本府看得楊應龍父子罪逆滔天大肆兇殘本府奉命征討誓在搗巢擒斬以謝 天人焉敢私受汚名以渝臣節除將引進頭目緝打四十將來使二人斬於營門懸



示并傳諭大小三軍同心戮力共擒兇殘外今將餽送騾  
子二匹金盞銀臺一副折程儀二十兩著段二端并原禮  
單差人齎上乞賜驗明貯庫以白此心仍乞通知諸路將  
領各據忠赤進剿等因又據本府批差罵色游子孟柯余國  
榮等押解生擒賊犯二名一併呈解到司審據二犯供名  
羅才羅慶播州大夫壩住從海龍困下來有管勾差他採  
聽水西營兵若干被鎮雄府採兵拏獲有應龍差小童吳  
比金萬富等三人前來鎮雄府送下程禮物當將吳比二  
人梟斬是實等情供報在官該本司審看得鎮雄府知府  
隴澄樹功念切滅賊氣雄狡酋百計彌縫寧使隴兵長驅

直搗進落濠關進大水田距州僅拾餘里終不以一矢相  
加遺顯托孤兔之意與連韓魏之交不謂把總陳啓禮被  
射於長箐私計隴澄必激怒於戲下假謝過以致餽將嘗  
探而行成向非隴澄之激壯幾墮狡酋之姦詭立斬來差  
以殉盡沒來餽首解斷悠悠之情賈桓桓之勇不三日而  
有母氏困之捷本官向來未白心事亦足釋然於衆口矣  
多方詢訪僉同生擒口供允確所據呈解折程金杯銀盤  
衣段騾匹等件理合同生擒賊犯一併解詳到臣臣除將  
騾匹發軍前用金銀杯盤衣段等物發貴陽府貯庫外今  
據前因該臣會同總督川湖貴州軍務兼理糧餉巡撫四



川地方兵部右侍郎兼都察院右僉都御史李化龍看得  
逆酋楊應龍本以羸角之羊敢同負隅之虎連年東衝西  
突自謂峻關長江之險官兵即雲屯電驅安得一日遽從  
天下所狼顧者安氏近聯畛域其氣力其兵馬器械其漢  
目把之機警言蹶張皆足屈其力而制其命則有幣厚言甘  
納交要盟庶幾安氏之顧狐兔而興思耳先是河渡失守  
左監軍立檄隴澄力能救則躡踪邀賊歸路不能則乘虛  
直搗賊巢隴澄立報救河渡必三日抵播境只二日與其  
攻外而遠不若攻內而近遂拔營以行左監軍以揭報臣  
臣心壯之豎子乃亦有直走大梁意乎而猶未之信也越

數日而有大水田之報合安疆臣兵破落濛關攻母氏圍  
截賊於清潭水馳報到臣復竒之豎子乃亦有馳入趙  
壁意乎臣爲具題作彼兄弟敵愾而猶未敢必也越數  
日而又有今日之捷焚彼兔窟積彼承牙截彼鼻翼若偽  
提調僞內府把總苗頭據報不下五十餘人報斬級漫山  
堆箐以萬計馘其子奪獲金銀鞍劍則生擒何老之口具  
能言之又據報桃溪衙新庄後庄盡爲煨燼煙火彌天雖  
渠魁尚未就縛而羣兇早當落膽自有事播無此捷矣臣  
一面會同按臣委官勘覈更催安疆臣隴澄獎率各軍奮  
勇滅賊催督各路竝進給發糧餉接濟外是役也監軍按



察使楊寅秋副使洪澄源運籌帷中指掌而譚擒縱總兵  
童元鎮參將朱鶴齡宣力闡外悉心而効馳驅內楊寅秋  
之操弄殫竭心力洪澄源朱鶴齡之羈縻備嘗荼苦功當  
首敘童元鎮蹶且益奮所當以功贖罪者也宣慰安疆臣  
餐風沐雨雖眚一目而神彌王揮戈環甲即殞一女而家  
不顧長驅貔貅之旅士飽馬騰席捲狐兔之羣禽獮草薶  
是母是子誰云一篋謗書難弟難兄無復三至市虎鎮雄  
知府隴澄以十七歲將家之子負一寸丹赤子之心必欲  
立功報 朝廷誓不以賊遺 君父振臂而士皆用命一  
呼而功收先登至者賊萌於公帑香餌不關其念兼斬來

使於營邸舊驪寧皇其衷洗刷可杜青蠅激壯足張赤膽  
查得賞格內有能奮勇先登破播州城者陞五級予三千  
金破海龍圍者陞七級予五千金擒楊應龍者照增定陞  
賞予萬金此亦疆臣隴澄畢力之秋矣伏乞 皇上勅下  
兵部將楊寅秋等分別紀錄寇平優敘童元鎮俯從議贖  
更乞 天語叮嚀安疆臣隴澄乘此破竹一舉犁庭速殄  
兇殘以慰神人則西南之綏戢可期而安攘之 奏凱不

日矣謹題請 旨



此書之序  
 以人其人  
 其人之名  
 其人之事  
 其人之言  
 其人之行  
 其人之志  
 其人之德  
 其人之業  
 其人之功  
 其人之名  
 其人之事  
 其人之言  
 其人之行  
 其人之志  
 其人之德  
 其人之業  
 其人之功  
 其人之名  
 其人之事  
 其人之言  
 其人之行  
 其人之志  
 其人之德  
 其人之業  
 其人之功





